

## **Kálag e'só echě Paalε áténlé Timotiε Ndibned ní kálag**

Timotiε abédé kódemod echě endúbé Krístæ. Ambíd á Esia Maino. Nyaá abédéε mmwaád a Israel, sáá-'ε mod a Grikia. Ahõñné'áá Paalε ábelé-'ε nsón ní Dyõb ne mó. Kálag e'só echě Paalε áténlé Timotiε ekoo' metón méláán ahób.

Dyam dé'só, ene kálag esíme bad etúu áte átéd pónde ne ayáge dé metóm áde abédé á mwembé-te. Adén ayáge dênladtén mekan míme bad bé Israel béhídé'áá ne míme bad ábe béesě bad bé Israel béhídé'áá. Adê ayáge abédé nén bán nkõñsé míme bad bédíí áte níde ebébtéd, bán nzé mod ákũd-te e'soosõñ atáñgéné abíí mekan mé e'koñéd ábelé-'ε mekan nêñgáne ákii donge á ndyééd ne ádyεε ésebán mod awóo' mmwaád ké'ε mmwaád awóo' nchóm. Enén kálag ehóbe ámpē ngáne bad bétáñgéné mwembé alyáged, ngáne bétáñgéné Dyõb edúbé abε, ne nyaa e abé echě bad ábe bélyágte mwembé ne ábe béwõñgan á mwembé-te bétáñgéné awõñ. Asóged, Paalε alébe Timotiε ngáne átáñgéné mbaledε awe Yesu Krístæ a bwám abé ne nsón míme átáñgéné abel áfíntê e bad ábe bédúbpé Krístæ.

### **Nkabtéd ní kálag**

Ndibned ní kálag *1.1-2*

Elébé tãñgene mwembé ne bad ábe bélyágte mó  
*1.3-3.16*

Timotiε akudé elébé tãñgene míme nsón *4.1-6.21*

*Paale alómmé Timotiē melēnten*

<sup>1</sup> Mε Paale, με-εέ ntelé enén kálag. Ndii mbapεε a nlómag awě Yesu Krīstəə. Ndake echě nkúdé ábel nímé nsón ehúú ne Dyōb, mó awě asoó syánē áyāl e mbéb, ehúú-’ε ne Yesu Krīstəə, mó awě adé syánē e’lyág bé nlém.

<sup>2</sup> A-Timoti, με-εέ nítenléé enén kálag. Edii nēngáne awem mwān mwēn, adúbe áde édúbpé Krīstəə. Nsimé, ngol ne nsaη níme ríhúú ne Dyōb Titée awêd ne Yesu Krīstəə, Sáηgwéé awêd mbê ne με.

*Paale alébe Timotiē tâηgene  
bemeléede bé metóm*

<sup>3</sup> Ade nkágé’áá á mbwóg e Masedonia menláá με μεέ élyag hē á dyad dé Efesus ábel boη weémwāg μεέ donge á bad béyágte’ ayáge áde déetâηgene.

<sup>4</sup> Weémwāg-ke-se ábê bad bébēbtē pón dé ákal póle éche éesě mbále ne póle éche éhóbe tâηgene ábāb betaa ábe mod éehelée-se atóη. Nzé béyágte échē ndín é póle épεεne mpentēn, éēwōηgānnē bad áwóη alongé áde álúmte bán bédúbpé Dyōb.

<sup>5</sup> Nzom echě enkāη boη nláá με μεέ éyágte bad ayáge áde átâηgéné edii ábel boη bad bédāη nhóg ne aníní. Etâηgéné edāηge awóη éche ébide’ á nlém níme rísáá, nlém níme mbíí dyam áde átâηgéné ne áde déetâηgene, mbíí-’ε adúbe áde áde mbále.

<sup>6</sup> Donge á bad béēhīdēē nímén mekan, nē ábelé bépáné nzii ahób áde béhóbéé e’kúkú é’ mekan.

<sup>7</sup> Abê bad béwóó nlém áte ábé bemeléede ábe béyágte mbéndé é Dyōb boη béēsōηtenεé mekan níme bélâηgeé bad, béēsōηtenεé-’ε mekan níme béhóbéé bán békóó abíi.

<sup>8</sup> Debíí nén bán mbéndé eboó nzé bad bébenlad chó ngáne éhɛdnad-té.

<sup>9</sup> Debíí'ɛ nén bán Dyõb déebelɛé mbéndé áyāle bad ábe bébele' ngáne áhɛdɛé. Boŋ Dyõb ábélé mbéndé áyāle bad ábe béehidē mbéndé ne bad ábe béebelé' ngáne áhɛdɛé. Abelé mbéndé áyāle bad ábe béewóo Edəádəŋ é Dyõb áte, ne bad ábe bébele mbéb. Bébélé mbéndé áyāle bad ábe béewóo mbwóg ní Dyõb áte, ne ábe béhóbe Dyõb mekan mé mbéb áyāl. Dyõb ábélé mbéndé áyāle bad ábe béwúɛ' ábab besáá ne benyaá, ne bad ábe béwúɛ' bad bémpēe.

<sup>10</sup> Bébélé mbéndé áyāle bad ábe békábe mesón, baachóm ábe bənaŋnad baachóm bémpēe, bad ábe békóbe bad boŋ bésóm bó néɛ betāŋ, bad ábe békale metóm, bad ábe bémwág melɛ mé metóm á pónde e nkáásé ne bad ábe bébele' kéchéé éche éesɛ nchoo ne ngáne ayáge á bwām áhóbɛé.

<sup>11</sup> Adé ayáge áde nchoo ne nkalaŋ ní bwām míme Dyõb ábágé mɛ ákale bad. Mmê nkalaŋ ní bwām níhúú ne Dyõb dé ehúmé áde bad békɛnɛé.

### *Nságnɛn áyāle ngəl e Dyõb*

<sup>12</sup> Nságnan Yesu Krístəə, Sánŋwéé awêd, mó abage mɛ ngíne ábel mímém nsón. Nságnan mó áyāle anyín áde anyíné aá mǎbəl mó nyaa eche etəŋgéné, ápwɛd-tɛ mɛ ábele mó.

<sup>13</sup> Ambel nê, kénɛɛ édíí bán ngen e'só nhóbé'áá mó mam mé mbéb áyāl, nítagté bad ábe bédúbpé mó, mbɛnlád-tɛ e'yale bé mbéb áyāl echê. Boŋ Yesu Krístəə anwóg mɛ ngəl áyāle menkēmpaá adúbe awón, menkēmbíí-'áá chóm éche níbelɛé.

14 Sáηgwéé ambě me nímē nsimé níme méesě ahəgten, ábēl ndúbé Krístəə, ábēl-’ε aá nílúmed bad bémpēe edəηge áyāle dedé nhóg ne Yesu Krístəə.

15 Yesu Krístəə ampě a nkōηsé ásoη bebel bé mbéb. Mmēn-ne mbédé mod awě atómtánnáá mbéb abel tómaa moosyáál. Enén póle edé mbále detəηgéné-’ε chó akoη dé adúbe.

16 Boη Dyöb dénwōg me ngəl áyāle ahədə’áá aá Yesu Krístəə álúmed aá nímē nwεsen méewóó’ε asóg áyāl e me awě ntómtánnáá mbéb abel tómaa moosyáál. Nén dēmbenléd nēηgáne eláηsén wée bad ábe bédübē, békūd-te alongé áde déemaá’.

17 Ehúmé ne edúbé bebē ne Dyöb á ngíndé ne á ngíndé. Mó adé kəη echě edé á ngíndé ne á ngíndé. Mós-’aá adé ane awě bad béēnyínnēē díd awě eewág-ke. Mwēmpen-εé áde Dyöb. Ebē nē.

18 A awem mwān Timoti, mekan níme nílāηgέε wε méeé ébel, médii mekan níme Dyöb dénlāā’ε bad aá béhōb bán mébenléd áyāl echōη. Abē e’yale é’wēd wε áte. Abenled áde ébenladte ayáge á mbále é’bel wε ébē nēηgáne mod awě awane nzum bwām.

19 Enyín-ne nén wεé móchəηnēdē ne adúbe ádé édúbpé Krístəə, ébele-’ε mekan bwām ngáne nlém nílāηgé wε. Doηge á bad béebeléé ngáne nímab nlém nílāηgé bó. Nén ákóó béchénné ádab adúbe béēbíí’ε wée békagké.

20 Atíntē e bad ábe nհóbeé nē, nhóg adé bán Himenose, aníníí-’ε bán Alesandaa. Abén bad ntědté bó á mekáá níme Satane ábel boη bebíi nén bán éeboo’ε áhób Dyöb mekan mé mbéb á yāl.

*Elébé tâṅgene ábe Dyöb edúbé*

<sup>1</sup> Dyam dé'só, nwéde wε aláa nén mée nyékânnad moosyáál. Nyékânnad bad bémpēe. Nyékâanne nén bán Dyöb álóme nyé bwēm ábe nyétógnéné, nyéságnan-ne mó áyāle mboṅ níme ábenléé nyé ne bad bésyāāl.

<sup>2</sup> Nyékânnad kâṅ é bad ne bad bésyāāl ábe bédé á nkamlēn. Nén débēl alongé áde syánē débē nsaṅ ésebán mehób médé, débélé ngáne Dyöb áhedeé, débagé-'ε mó edúbé á menzii mésyāāl.

<sup>3</sup> Akânned bad ábóó. Nén áwógte Dyöb ádé ásóó syánē menyinḡe.

<sup>4</sup> Dyöb áhede aá moosyáál ákud e'soóson básōṅten-ne mbále echē Eyale é Dyöb ékaléé.

<sup>5</sup> Ebyééné nén bán Dyöb ahóg dēmpen dóó ádé. Mod nhóg mwēmpen-naá adé awē apεene Dyöb ne baányon á nchemten. Ane mod adii Yesu Krīstā.

<sup>6</sup> Ambē ádé alongé áwé á nló mí moosyáál. Ene kwééd echē awédé a nló mí moosyáál enlúméd á pónde echē etāṅgéné nén bán Dyöb áhede aá moosyáál ákud e'soóson.

<sup>7</sup> Ayāle nén dóó akáá boṅ Krīstā álōmē me née mbapεε a nlomag áke dé akal nímē nkalaṅ tâṅgene adúbe á Krīsto ne mbále, wée bad ábe béesē bad bé Israel. Dyam áde ríhóbeé ádé mbále. Meékālēē metóm.

<sup>8</sup> Né-óó hōm ké áhéé adé bad bé Krīsto béladnéé, nhede nén mée baachóm ábe bébágé échab yāl ábele Dyöb bényene mekáá ámín bébage mekáne. Abē bad béētāṅgenéé melinḡá ahé á nlém káa béētāṅgenéé bad abé ábe básenle'.

<sup>9</sup> Nhede-'ε ámpē nén mée bebaád béhâḡ mesan nímé bad bényinnē nén bán métāṅgéné. Mmāb

mesaŋ métəŋgéné bó yəl akúten bwâm ésebán métēde baachóm nlém á abum. Béenabpé esid é nló nyaa echě etómé áte, béēhāg bwēm é' gól, béēwāā' nsāŋ níme bébénlé bān bé meláá mé etógnén, béēhāg-ke mbóté éche étómténé nkun abé.

<sup>10</sup> Bon pən mímāb mbeltéd mí bwâm nílúmed nén bán bédíi bebaád ábe bébenle Dyöb.

<sup>11</sup> Mmwaád atəŋgéné ádyēē piíb, ásūdēd yəl bon áwōglān ngáne baachóm bəyágtéé.

<sup>12</sup> Meehóbéé nén mēé mmwaád awóó kunze áyáged káa ákamlen baachóm. Mmwaád atəŋgéné ádyēē piíb.

<sup>13</sup> Nhóbé nén áyāle Dyöb dénsēbē Adamε ahəg bon áhəgé' Ifε.

<sup>14</sup> Ebyééné-'ε nén bán mmwaád móó Satanε ándogké bon abóó mbéndé, saké Adamε. Né-óó mmwaád mó ambóó mbéndé.

<sup>15</sup> Bon Dyöb désōŋ alongé dé mmwaád á pónde e achád nzé adíi asumé nlém wée Krístəə alúmté-'ε edəŋge ne bad bəmpēe, eewóo-'ε atón dé mbéb ké ahóg áyāl.

### 3

*Paale atēnlé Timotie təŋgene belyáged bé mwembé*

<sup>1</sup> Nzé mod ahεde aá móbē nlyáged a mwembé, né apwεdé kase e nsón. Enén póle edé mbále.

<sup>2</sup> Bəəb-pəó, mod awe alyágte mwembé, atəŋgéné abé mod awě bad béēhōbēē mekan mé mbéb á yəl, atəŋgéné-'ε dásō mmwaád nhóg awon.\* Abé

\* **3:2** Atəŋgéné-'ε dásō mmwaád nhóg awóŋ káa atəŋgéné dásō mwaađ awon ngen póg ne ngen ésyāal káa mod atəŋgéné dásō mwaađ mwəmpən anaŋned.

mod awě akóbe yǎl, abé mod awě adole dyam áte bwâm, abé mod awě adělté yǎl áte, abé mod awě akobe beken, abé-’ε mod awě abíε bad ayáged.

<sup>3</sup> Eebág mod awě abagé yǎl á amwé á mǐm, káa mod awě apεεne epuutéđ. Bon abê mod awě apwiítédé, abê-’ε mod awě eésenlé’. Eebág mod awě atómténé mǎné adəŋ.

<sup>4</sup> Atəŋgéné abé mod awě achəŋgé eche ndáb bwâm, abōŋgē-’ε ábe bǎn nyaa echě bėwógnεé mó bėbagé-’ε mó edúbé á menzii mésyāāl.

<sup>5</sup> Nhóbe nê áyāle nzé mod eéhele eche ndáb akamlɛn, chán-nō áhenlé mwembé ní Dyōb akamlɛn?

<sup>6</sup> Eetəŋgenéε se abé mod awě adúbpe Křistə ekóólé ekóólé. Esebé nê, né ābē kúmbe, chó ēbēl ákwε, ākūd-τε nkógsɛn melemlɛn ngáne Satane ānkweé bon ākūd-τε nkógsɛn.

<sup>7</sup> Abád ámpē, ane mod atəŋgéné abé mod awě káəŋne bad ábe béesě á mwembé bėbageé edúbé. Nén débēl éekudté akwágké éehūn-naá melám míme Satane áhíínédé mó.

<sup>8</sup> Bad ábe bėwōŋgan ábel nsón á mwembé, ébê melemlɛn née bó. Bétəŋgéné abé á bwâm awóŋ, bėbé-’ε bad ábe bėhóbe dyam ne nlém nhóg. Bėetəŋgenéε bad ábe ábē bėbágé yǎl á amwé á mǐm, káa bad ábe bédé metəg áyāle mǎné.

<sup>9</sup> Bétəŋgéné bėhíd mbále echě Dyōb ábeleé bon bad bėbíí təŋgene mewēmten míme áhedεé aá bėwōŋ ne abé áde áhedεé aá bėwōŋ. Bétəŋgéné bėbēl nê ne nlém míme mǐbíí chōm éche étəŋgéné.

<sup>10</sup> Belyáged bédēhób bǎn bėpwede bad ábe bėwōŋgan á mwembé-te, bétəŋgéné bad ábe bėhedεé apwεd asebe dé asimɛn. Nzé bényíné

nén bán mod awě bésímné eewóó'έ awusé ké ahóg á yǎl nê ane mod akwögnédé âbel nímê nsón.

<sup>11</sup> Káôñne ábāb bebaád bétāngéné abé á bwām awón. Béēbāg bebaád ábe bēhóbe bad ámbíd, bēbê bebaád ábe békóbe yǎl, bēbé-'ε bebaád ábe bad béhele-ε bésūm nlém á yǎl ne kéchéé éche bēbēlé.

<sup>12</sup> Mod awě awōngan âbel nsón á mwembé atāngéné dāsō mmwaád nhóg awón. Atāngéné abé mod awě abōnge ábe bán ne bad bémpeē ábe bédé áwe ndáb bwām.

<sup>13</sup> Nhóbe nê áyāle nzé bad ábe bēwōngan âbel nsón á mwembé bēbele nsón bwām, bad bēbe bó edúbé. Nén débēl bēwón nlém áhób tēngene adúbe áde bēwóó ne Yesu Krīstæ.

### *Dyam dé e'koñéd áde dēntīm abyēn*

<sup>14</sup> Á Timoti, kénéé edíí bán nwóó nlém âpe áwōñ mwāmpīn pón dé, ndíi ntenle wε enén kálag.

<sup>15</sup> Ntenle wε nímén mekan níme étāngéné abel âbel nén ké meéyōge ape, ehēle ebíí nyaa e abé echē bad bé Dyōb bétāngéné awále. Bad bé Dyōb bóó bédé mwembé ní Dyōb, Dyōb ádé-'ε á alongé. Mmê mwembé móó rídé nēngáne akon ne nsáaned níme níchāngé mbále Eyale é Dyōb bwām. Ahed dós-'aá ene mbále ébwógnédé. <sup>16</sup> Dyōb ábélé syāā debíí nén bán nímē nkalan ndé etógnén bwāmbwam. Ndé nén bán:

Krīstæ ampě, abé-'ε moonyon,

Edāédāñ éche Esáá énlūméd sé nén bán adíi Mwān a Dyōb,

ángel-le ényīn mó.

Bēnkálé bad bé nkōñsé bésyāāl, bēndūbē-'ε mó.

Dyōb dēmpuúd mó ákē-'ε ádyōb ne ehúmé ésyāāl.



## 4

*Paale alébé Timotie tângene bemeléede bé metóm*

<sup>1</sup> Edáádəŋ éche Esáá énhōb bwâm nén aá, nímén mesú donge á bad bétédé adúbe á mbále ádá, bédúbpē bad ábe báyágte ayáge dé metóm. Adén ayáge dṵṵ e'dáádəŋ bé mbéb é'hedéé aá bédúbe.

<sup>2</sup> Abén bad bébele' byánán békale mbále boŋ metóm mṵṵ békaleé. Nzé báyágte chōm éche éetāngene bélúmte nén bán béébii' é nhəŋlén áfinté chōm éche étāngéné ne éche éetāngene.

<sup>3</sup> Abén bemeléede bé metóm, báyágte bad bán béewóŋné, bán bad béēdyāg-ke donge dé medyé. Dyōb dēnhāg nímé medyé ábel nén bad bēdyāg mó. Bad ábe bébii nkalaŋ ní bwâm, bédúbpé mó, béságnanne Dyōb áyāle nímé medyé.

<sup>4</sup> Abē bemeléede béētāngeneé, áyāle kéchéé éche Dyōb áhágé ébóó. Nzəm ké póg eésáá ábán donge dé medyé. Né-ṵṵ, déságnen Dyōb akud áde dékudéé ábén bwēm.

<sup>5</sup> Mod eékīē ndyééd, áyāle Eyale é Dyōb ne mekáne bébele chó éboŋ adyé.

*Paale alángé Timotie  
ngáne átāngéné mbəlede  
a bwám awe Krīstə abé*

<sup>6</sup> Nzé eyágte bad ábe bédúbpé Yesue nímén mekan né wēbē mbəlede a bwám awe Yesu Krīstə. Wēwēdnēd-te áte á edáádəŋ-tē áyāl e nkalaŋ nime édúbpé ne áyāle ayáge dé eyale é Dyōb áde éhídéé ámbíd.

<sup>7</sup> Weewóó dyam dé abelen ne póle éche élúmte bán bad béédúbpéé Dyōb, ne e'yókél é' póle. Boŋ pen éyágke' pónde té ábel ngáne Dyōb áhedéé aá ébel.

<sup>8</sup> Edé etógnén mod âyáged yäl e nkõnsé, áwéd ch́ó áte. Bonj étómténé etógnén abé nzé mod awédé yäl áte ábel ngáne Dyõb áhedéé áyāl e chõm ésyāäl. Débel ngáne Dyõb áhedéé áyāle, Dyõb áhóbé aá ḿóõbě syánē alongé áde déemaá', b́oõb ne á póndé echě ehúé'.

<sup>9</sup> Adén dyam áde nhóbé nén ádé mbále. Nyétāngéné d́ó adúbe.

<sup>10</sup> Né-õó, nén d́óõ áḱáá bonj dényõdé, déwanté-ε yäl áte áyāle delyággé nlém ne Dyõb áde ádé á alongé. Ḿó abage baásyāäl e'soóson, bwámbwam bad ábe bédúbpé ḿó.

<sup>11</sup> Nyín nén wéé ḿólāngē bad ábe bédúbpé nímén mekan, wéé ḿóyāgtē-ε b́ó ḿó.

<sup>12</sup> Weémwāg-se modmod anyín wε nkóntéd áyāle édíí ḱódemod. Bonj pen lúmed bad ábe bédúbpé abé a bwám ábel bonj b́ómpē bébel melemlem. Nyaa echě éhóbéé dyam, abé áde éwóó, nyaa echě édáá bad, nyaa éche édúbpé Dyõb ne abel áde wéebeléé mekan mé mbinde ábē nēe elānsén wéé bad ábe bédúbpé.

<sup>13</sup> Enyín nén wéé ḿólāa' Eyale é Dyõb nzé bad b́eládné á mwembé-te. Elānge b́ó chõm éche échē Eyale é Dyõb éhóbéé, éyágte-ε b́ó ḱáāñ né mpedé.

<sup>14</sup> Weétedt́é nsón níme Dyõb ábágé wε nēe nde, áláa bad mekan níme Dyõb dénhõbpē aá éláa b́ó á póndé eche belyáged bé mwembé b́émbānnē wε mekáá á nló.

<sup>15</sup> Belé nímén mekan ne nlém nhóg ábel bonj baásyāäl b́ényín nén bán ebele ḿó bwám, ekεene-ε ḿó á'sõ.

<sup>16</sup> Etõñ yäl acháá bwám ne kéchéé éche éyágteé bad. Kεené' nē á'sõ, ábel bonj Dyõb áson wε alongé,

ásōη-’ε alongé á bad ábe éyágtεέ.

## 5

*Paale aláηgé Timotiε ngáne átáηgéné  
donge á bad acháa á mwembé-te*

<sup>1</sup> Weekánné mod a mbáá áte. Cháá mój melemlem ngáne ehεle-se echáá sóó mwēn. Cháá bad ábe béepede wε kóđ néε baányonη bé baachóm.

<sup>2</sup> Cháá bebaád bémbáá nēηgáne éhεléε-se echáá nyóó mwēn. Echáa-’ε ngōndére néε baányonη bé bebaád. Weewóηné bó mekan mé mesón á mewēmtεn.

<sup>3</sup> Bekúd ábe béewóo bad ábe bēnōne bó éwōηgan bó.

<sup>4</sup> Bonη nzé nkúd achyáá bán káa bán ábe ábē bán, bétáηgéné mój atōgen. Nén ádé dyam dé’só áde bad ábe bébele ngáne Dyōb áhεdeé bétáηgéné abel. Abāb benyaá ne besáá bēntōgén bó, bómpē bétáηgéné bó atōgen. Nén áwógte Dyōb menyīnge.

<sup>5</sup> Nkúd awē adé mwēmpen bonη eewóo mod awē awōηgan mój, wéε Dyōb dēmpen dōó ályágeé nlém. Abē ákānne’, áhεdne-’ε mój nwōηgen nkuu ne mūte.

<sup>6</sup> Bonη nkúd awē asólté yāl á mekan mé nkōηsé, awédé á edáádāη, kénée ádíí á alongé.

<sup>7</sup> Láá bad bé mwembé nīmén mekan ábel bonη mod eehóbé bó mekan mé mbéb á yāl.

<sup>8</sup> Nzé mod a Krīsto eétōgné bad bé túmbé ábē, bwāmbwam áde abum a ndáb, né alūmte nén áá móódúbpeé Krīstā. Ene ndín e mod nīmē mbeltéd nílūmte nén bán adii mod awē abelé mbéb tómaa mod awē eedúbpe Krīstā.

<sup>9</sup> Nkúd awě éhēle-se etónj wεé atánjéné nwōnjen akud, adii nkúd awě atómé móom mé mwě ntóób. Atánjéné abé-'ε nkúd awě a nwónj nchóm nhóg mwěmpen.

<sup>10</sup> Ane nkúd atánjéné abé mmwaád awě bad bényíne bán níme mbeltéd mbóó. Atánjéné abé mmwaád awě apéne bán ámín bwâm, abé mmwaád awě akobe beken awe ndáb bwâm, abé mmwaád awě asudte yǎl, ábenlé bad bé Dyōb nyaa echě áwóbpé'áá bó mekuu. Atánjéné mmwaád abé awě awónjéné bad ábe bémbē á ndutul-té, ábē-'ε eche yǎl ábel mekan mé bwâm.

<sup>11</sup> Bonj weetóó bekúd ábe bédé etum nēnjáne bekúd ábe békud nwōnjen. Weetóó bó áyāle nzé béwóó esíí áwónj bechóm ámpē béebeléé Krīstā ngáne éhednadté.

<sup>12</sup> Nzé béwóó-'ε bechóm bémpēe né békwoǵnéde ákud nkógsen, áyāle béelōntéé akag áde bénhēē nén bán bébelé Krīstā.

<sup>13</sup> Saá-kaá nē dēmpen, béwóó abé áde béebeléé chōm, béhyóme ndáb ne ndáb. Ámín enē béhóbe bad ámbíd, béhāg nsəl áyāl e mekan mé bad, béhóbe-'ε mekan níme bēnkēntánjénne ahób.

<sup>14</sup> Né-ǵó, ndáó mεé e'tum bé bekúd béwónj bechóm, béchyáa bán, bébōnǵe-'ε échāb ndáb. Nén déběl béebeléé mekan níme bad ábe békóó syánē béhōbēē syánē mekan mé mbéb á yǎl.

<sup>15</sup> Nhóbe nén áyāle ábén bekúd donǵe bébóótédé mekan ábel níme Satanε áhedéé áá bébel.

<sup>16</sup> Mmwaád ké ahéé awě adúbpé Krīstā awě awóó bekúd áwē abum á ndáb, atánjéné bó atóǵen, saké nén bán ápēmted mwembé níme nted. Nén débě mwembé etál ábóo bekúd ábe béewóó bad

ábe bébôηge bó.

17 Mwembé mβε bad bémbáá ábe bélyágte bó bwâm edúbé ne nsábe, bwâmbwam ábê belyáged ábe bébele nsón mé akal ne áyáged Eyale é Dyöb.

18 Edé nê áyāle éténlédé á kálag e Dyöb nén bán, “Weetádé nyag nsəl eche esálte ngun.” Eténlédé ámpē nén bán, “Bebel bé nsón bétāηgéné mímab nsábe akúd.”

19 Weedúbpé mekan míme bad béhóbεé belyáged bé mwembé áyāl, éetómεé né mbónj éβε káa éláán étyéémé nén bán nê ádé mbále.

20 Nzé mod ámbáá a mwembé abelélé mbéb, káné mó áte á’sō é’ mwembé ábel bonj bad bémbáá bémpēe bébāη mbéb abel.

21 Nlāηge wε á’sō é Dyöb ne Yesu Krístæ ne á’sō é ángel éche épwédnédé μεé ébel chōm eche étāηgéné abel, ésebán ekwognad modmod. Weétimē-ε modmod ambíd.

22 Weewámsán mod mekáá abán á yāl áwóged mó mod a mbáá a mwembé. Nzé ebelé nê bonj ane mod atímé mbéb abel, ne wémpē ebelélé mbéb. Mmōη weébēlē mekan mé mbinde.

23 Weemwág mendíb mwēmpen ámpē. Mwág mwǎ mím ábel nén abum áde ákwaglan wε áte pónde ésyāēl ámaa.

24 Donje á bad bébele mbéb á nhéné míme moosyāēl ábíí, békāād-te bó. Abíníí-ε bébele mbéb á mesōm-tē míme bad béēbíí’ε káōη né béhédé áte.

25 Melemlem nê dōo donje á bad bébeleé mbonj míme míbyééné ne moosyāēl. Bémpēe-ε bébele mbonj a mesōm-tē míme bad béēbíí’ε káōη né béhédé áte.

## 6

<sup>1</sup> Bad ábe bédé betân bésyāāl bétāngéné bébage bad ábe bédíi ásē echâb edúbé âbel boŋ mod-mod eehóbé Dyöb mekan mé mbéb áyāl, eehóbé-’ε ayáge ádēd mam mé mbéb áyāl.

<sup>2</sup> Betân ábe bédé ásē e bad ábe bédúbpé Krīstəə béewēmtān bán ngáne ábab besáá bédíi bad ábe bédúbpé, béetāngeneé bó edúbé abε. Bétāngéné bó abele tómaa ngáne béhélé’áá-sε bébēlē bad ábe béedúbpε Krīstəə. Bétāngéné abel nê áyāle ábab besáá ábe bébenléé bédíi bad ábe bédúbpé Krīstəə bébé-’ε bad ábe ábāb bembəlede bédáá-’ε.

*Paale ahóbe tāngene ayáge dé metóm ne nhən nīme rītāngéné*

Eyágte bad mímén mekan éwêd-tε bó nlém á abum áhíd mó.

<sup>3</sup> Doŋge á bad bédé ábe béyágte’ ayáge áde déetāngene. Adab ayáge déesaá melemlen ne ayáge áde awed Sāngú Yesu Krīstəə áde ayágte bad âbel ngáne Dyöb áhedeé.

<sup>4</sup> Ábê bad bélóné ne kúmbe, béébíi-’áá dyamdiam. Nyaa eché ábê bad bédáá mpentεn mé e’yale ne nselag edíi bó nēε nkole. Nén áπεene kónjí átínté echâb, áπεené mehób átínté echâb, bad béhōbē-’ε baáb mehób mé mbéb áyāl, béwōŋnē nhóg ne aníní mewēmtεn mé mbéb.

<sup>5</sup> Nén ábele-’ε bépentan póndé té nyaa eché béehelée-sε bébíi chōm éche étāngéné. Béehelée-sε bésōŋtén chōm éche édé mbále ne éche éesē mbále. Béwēmtan bán nzé bébenle Dyöb, né bébē nhən.

<sup>6</sup> Boŋ mod äbē menyiŋge bwâmbwam nzé abele' ngáne Dyöb áhedeé nzé atéde-'ε aá kéchéé éche m'wóó ékwógnédé m'.

<sup>7</sup> Depedé á nkõŋsé, deépeeneé chõmchõm, nzé dewédé-'ε, déeswéénné chõmchõm.

<sup>8</sup> Né-óó, nzé dewóó ndyééd eche dédyāgkē ne chõm éche déhāgkē á yāl, né nê ákwógnédé syānē.

<sup>9</sup> Boŋ bad ábe béhede nhøn asud, bébelé béhún á mekagsen-tê, bébé ngáne bad ábe békwédé melám. Bébelé béhedé mekan Abel híin míme mééboo ne mekan híin míme mééboŋne b'ó. Nén ábele bétage bwâmbwam.

<sup>10</sup> Mod ké ahéé awě awóó nlém áte bwâmbwam ábud m'one awõŋ, abelé ábelé' e'bébtéd é' mekan ákud mímé m'one. Nê ábelé donge á bad bétédte ádúbe Krístæ, békúde-'ε ndutul híin á nlém tē.

### *Paale abagé Timotiε elébé*

<sup>11</sup> Boŋ we, á-Timoti, mod a Dyöb, bán ábê e'bébtéd é' mekan. Nané mekan ámbid míme métáŋgéné á'sõ é' Dyöb, édæŋ bad, éwesan póndé ésyāäl, épwiited-te.

<sup>12</sup> Wéd yāl áte ébê ésum nlém wée Dyöb ébenle-'ε m'. Alongé áde déemaá' áde Dyöb ábágé we, wéd d'ó achāned. Dyöb dēmbě we áde alongé áde wēnhōbpē á'sõ é' bad híin wéé m'ódūbpē Krístæ.

<sup>13</sup> Á'sõ é' Dyöb, m'ó awě abage bwēm ésyāäl alongé, ne á'sõ ábe Yesu Krístæ, m'ó awě ankal mbále á'sõ wée Pontus Payledε, nlāŋge we nén meé,

<sup>14</sup> ébele chõm ésyāäl ngáne Dyöb áhóbé aá ébel, káæŋne póndé eche awed Sáŋgwéé, Yesu Krístæ ápeé.

15 Apě á epun éche Dyöb Titée átíídé aá ápe, Dyöb ane awě ábē bad bébageé mekenag. Mwěmpen-naá adé Nkamlē a mbáá a nkōñsé n̄syāāl. Mó adé K̄ñ e k̄ñ ésyāāl abé-’ε Sánygwéé a besánygwéé bésyāāl.

16 Mwěmpen-εé awóó ngíne âbé á alongé á ngíndé ne á ngíndé, adé-’ε á e’nyínen bé ekíde ábe é’pene bwámbwam nyaa echě modmod éhēléé-εε ápē benben. Mó adé ane awě modmod éenyínēē mbéd, modmod éhēlēē-’ε-εε anyín mó. Edúbé ébē ne mó, âbē-’ε á nkamlēn á ngíndé ne á ngíndé. Ebē nē.

17 Síim bad ábe bédé nh̄on etíuu áte n̄n wéé béekumé ekáá á tâl, béesumé-’ε nlém áyāl e n̄māb nh̄on, bwēm ábe é’maa’, bon̄ bésun n̄māb nlém wéε Dyöb. Mó adé ane awě abage syánē ch̄m é’syāāl éche détógnéné âbel bon̄ débē menyinge.

18 Láá bó wéé bébele mbon̄ âwōngēn bad, ngáne bad ábe bébúdé m̄oné awóñ bébágkē nh̄on, mekan mé bwām n̄ime bébeleé n̄bē n̄māb nh̄on, béwōñ-’ε nlém âwōngēn bad ne kéchéé éche Dyöb ábágé bó.

19 Nzé bad bébele n̄n ébē n̄ngáne békōngé n̄māb nh̄on ádyōb. N̄n débē n̄ngáne nsáaned n̄ime n̄súmnédé bwām âbel bon̄ n̄sōgtēn mekan n̄ime méhúé’ á’sō âbel békud alongé d̄n áde ákōnté alongé abé.

20 A-Timoti, nsón n̄ime Dyöb ábage wε tōñ mó acháə. Weewóó pōndé ne mehób n̄ime bad béhóbεé n̄ime méēwōngān âbe Dyöb edúbé, ne mehób n̄ime donge á bad béhóbεé bán ch̄m ehóg édé mbále, bad bēmpēe-’ε béhōbē bán ch̄m émpēe ch̄w édé mbále. Bon̄ bó moosyāāl bébele



awusé nzé béhóbe bán, “Με-εé ndé mod awe abíí.”

<sup>21</sup> Donje á bad ábe béwêmtan bán bébíí mam míme méde, boŋ bën béekoó’é adúbe áde Dyõb á mbále ahíd.

Nsimé ní Dyõb mbê ne nyé moosyæál.

**Mel̃ Mékō̃lē**  
**New Testament in Akoose (CM:bss:Akoose)**

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Akoose

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48